

2 KOLINIT

Pawl inalet kweitan nimug nein Kolinit, silmanin tayakelesiys ven towen bikakins asisinap kalbaleb. Wankuyeim mo ipiyaves asisinap kalbaleb; mapuna asisinap bwanabwein bulagan ikow Titos, inow Pawl waseg. Mapuna imwasaw Pawl, mo kwayuwein-vak silet ilel min-Kolinit pines.

Kweiboug mwasanin nag itams Pawl nakaleiwag waseg, mapuna ilel kwayuwein let towen, ikkanes. Anilivan-vak nilel silmanin muloul; ilana, “Mtowen Titos bikow mimuloul pines tasimavs tasiyas niyakelesiys Yelusalem waseg.”

Anilivan-vak nilel livanen nawotet moumouvit, peinan ititavin, igeiguy bulagan Yeisuw, mapuna igege aban vena babaw waseg.

Nakabsilamaw

1 ¹ Kalin nuwag min-Kolinit yakamiy.

Yey Pawl, takawein livanen Yeisuw Kelis, yey; peinan Yowbad nanon mawan. Yey soug bwadads Timotiy nakalel millet neiw, kuvinis, Yowbad natayakelesiys yakamiy ven Kolinit waseg, simiyas tasiyas tayakelesiys ven avakaein Akay waseg.

² Tamads Yowbad son daGuyaws Yeisuw Kelis bisiwyoubumiy mo beitaw nuwamiy.

Aban igege tage ikalin nuwan

³ Kalin nuwem Yowbad. Mtowen daGuyaws Yeisuw Kelis Taman. Mtowen anmwanet ililabeids, mo itout nanouds.

⁴ Kweiboug abem igege ilabem vagan bakalabes tasiyas abes igege. E, bakalabes tasiyas Yowbad inalab to nilabem.

⁵ Kelis namouvit singay kalilivet, mo singay-vak ililabem.

⁶ Takinew abem bigeg mo bakalabeimiy vagan beitout ninoumiy, peinan abamiy igege yakamiy. Takinew abem bwein, bakalabeimiy vagan beibwein abamiy. Yowbad ililabem mo kakamtilakeimiy vagan bukukwakins Yowbad bilabeimiy, magat bukuptuleimiy waseg abamiy kalbaleb, mawan abem yakamey.

⁷ Kakakin-wan bukusesus bwein. Abamiy igege mawana abem yakamey, tage Yowbad bilabeimiy mawana yakamey.

⁸ Sigwey, awoum kutagouwawes kweiboug abem igeg ven Esiy nakases. Singay kawtamat, kadokena kid mwamovem bo ikous.

⁹ Kadoki bo beiwemas; tage Yowbad tatawtoun, taykitun takanigs; bo ikaluweg abem kalbaleb vagan bakanamis mtowen bikatinabwem; awoum bakanamis waseg matawtoun tatinem.

¹⁰ E, kakita bakakanig tage Yowbad ikatinabwem; e, tut wanakoug mo bikatinabwem. Kaninamis-wan peinan bo bikatinabwem waseg abem igeg.

¹¹ Yakamiy kulabemas peinan kuntougis Yowbad bikatinabwem; e, kunitougs simiyas babaw gamag, mo biligen Yowbad, bikatinabwem, mo bikalin nuwads simayas yakamiy.

Pawl sivanan binekes min-Kolinit

¹² Amalivan tawtoun peinan kakakin-wan amasinap bwanabwein, kamnat. Nag mawan ven watinow sinapun, tage peinan Yowbad nisiwyoubum ivagem mo nakamlavag takamnat yakamey, amasinap bwein wasigeis babaw gamag; singay gog wasigeis yakamiy.

¹³⁻¹⁴ Imilet nakalel kuvinis amalivan didumwal, kamnat. Kalamwey-nen kukwakins; sivanag geg bukuyakousis sinap kamnat, mo tutan daGuyaws Yeisuw beiyum beim mo bukumwasaws pinem tawlimiyas yakamey, o yakamey-vak bakamwasaw pinamiy tawlimayas yakamiy.

¹⁵ Kweiboug akakina bukuyakousis amisinap kamnat, mo ivag sivanag wanmugwana baw balakwaneimiy sivay, vagan bukumwasaws sivay.

¹⁶ Ivag sivanag balakwaneimiy mo banoun ban Masidoni; bayum baw, mo bukutaneigs ban Yudiy.

¹⁷⁻¹⁸ Awoum kudokes isisiyuw nanoug peinan nag aw. Ven watinow gimgilis mwasanin itimatamsa mav. Yey nag mawan, nag batam mav. Tabudabod tatoukum Yowbad.

¹⁹ Kweiboug sigwey Silvanos son Timotiy nakageiguy livanen Yowbad Natun Yeisuw Kelis; mtowen nag itimatama mav, tut babaw beitam mound.

²⁰ Mtowen Kelis waseg tabanes youd babaw bwanabwein, kweiboug Yowbad nilivnek. Mapuna tayemens waseg Yeisuw, Yowbad yakawanan silmanin.

²¹⁻²² Yowbad gog bo nivageids Kelis angamag simayas yakamiy, mo isekeids dawotets; mamagina napulsilas bo isekeids Kululuwan tonen wanuwads, mo takakins ikayuseids.

²³ Tage nag aw Kolinit, peinan nag sivanag bakaneimiy. Tabudabod Yowbad.

²⁴ Nag peinan tayakeikay yakamey, tapwaloul waseg, nag. Kalabeimiy vagan bukumwasaws, peinan nukutawtouns mitapwaloul waseg.

2 ¹ Kweiboug nanoug mawan, awoum vayuwein baw, bavag amimwasin. Misinaka alel millet neiw.

²Kadiloka bukuvages amnag beibwein. Kukin gog bakaneimiy mo bavag amimwasin, ta-kal bivag beibwein amnag; nag.

³⁻⁴Imilet towen nalel, singay igeg nanoug, woug singay moumouvit, sona gunvālam let towen alelel. Nag alelel vāgan beivag amimwasin, tage bukukwakins singay asiwayoub wasigeis yakamiy. Agulivan bo alel gunalet waseg vāgan tutan baw, nag bigeg nanoug amisinap kalbaleb waseg, peinan akakina-wan bo beivag amisinap bwein mo bamwasaw o yakamiy-vak bukuwāsaws.

Biwidis ansinap takalbaleb towen

⁵Bo alel millet towen vāgan bayakwaneimiy, bakin bukwanawes ayyag, o nag. Bo alel livānen teitan yakamiy takalbaleb. Mtownen nag iyageg nanoug agumwāneta yey, tage yakamiy; adok kakit-vak bo iyageg ninoumiy yakamiy. Awoum bikeikay wadoug wasigeis yakamiy.

⁶Towen ansinap kalbaleb bo kumapus yakamiy; bo misinak. Nanoug māwan.

⁷Nagein gog kadiloka bikanavin ninoumiy mo kunumlaves ansinap kalbaleb mo beitout nanon. Kadiloka kulabes gamag towen. Awoum singay nanon bigeg; bininuway mo biwtamat.

⁸E, kadiloka kusiwyoubus gamag towen beibwein.

⁹Wawun millet towen nalel vāgan mamagina bayakwaneimiy mo bakin bukwanawes agulivan babaw, o nag.

¹⁰⁻¹¹Kal ansinap kalbaleb bukuwid kunumlev, yey māwan banumlev. Kukin aveiyag bawid; pinamiy yakamiy wamatan Kelis, vāgan basilbwed Seitan. Awoum towen bitawtoun wasigeis yakids. Kakakin-wan non kalbaleb.

Nag itaw nuwan Pawl

¹²Misumkwey nan Tilowas vāgan bageiguy livānen Kelis, daGuyaws mo ikaliyow gunaked silmanin inawotet.

¹³Tage nag itaw nuwag peinan nag aban bwadag Titos, ven towen waseg. Mapuna alisawes, itaneigs, anoun an Masidoni.

¹⁴Kalin nuwem Yowbad, peinan Kelis waseg, tut babaw imingwayem mo katakayway, kakatimlakes sinapun Kelis ven babaw wasigeis, mamagina atanoun manisin iskwanes, simasim seikwan.

¹⁵Bo iskwaneimas, tasiyas Yowbad ikatinabwes sisiyas tasiyas biyagages; manisin amalivan mamagina Kelis inawotet silmanin Yowbad.

¹⁶Tasiyas Yowbad biyagages biskwanemas mamagina kanig manisin peinan bikankanigs. Tasiyas gog ikatinabwes biskwanemas mamagina mwamov manisin peinan biyamoves. Asteivin kadilokes mawotet towen? Adok nag ibabaw.

¹⁷Yakamey nag māwan tayyaweids tasiyas, kalisiy sivines bigeiguys livānen Yowbad, vāgan maysan bikawes. Tage amasinap kweitan,

kamnat; Kelis angamag yakamey, Yowbad nisekem mawotet mo kageiguy wamatan.

Pawl ansinap

3 ¹Tabta livnem bwanabwein bakasekeimiy, ne? Nag. Gamag mwasinis sivines silet mamagina: “Takawein let towen ansinap bwein.”

Nag ivag sivinem bukulel malet māwan, o gamag mwasinis bileles malet māwan, nag.

²Malet yakamiy, gamag babaw bivinis, mamagina bikines amisinap kamnat mo bikakins mawotet bwein. Nukutams waseg Kelis mo kumlavags mamagina let, Kelis nilel vāgan gamag bivinis.

³Yakamiy mamagina let, Kelis nilel, nakakow, kasekes tasiyas mo ivinis. Nag ilel pansel waseg, nag. Bo ilel waseg Kululuwan Yowbad tamwamov. Nag ilel wadakul mamas, tage bo ilel wakates gamag yakamiy.

⁴Mapuna kakapwapout wamatan Yowbad, peinan Kelis ilabem.

⁵⁻⁶Nag kadilokem bakalivan bakalana, “Matawtoun tatinem mo kawtel māwan.” Nag. Yowbad natawtoun bo isekem mo ikadilokem bakakow livānen inakaleiwag kweivaw, mo kasekeimiy. Kweiboug kaleiwag dakul waseg nilel tage kweivaw kaleiwag mo Kululuwan waseg isekeids. Kaleiwag towen nilel wadakul bikatimateids, tage Kululuwan iyamoveids.

Kaleiwag kweiboug o kweivaw

⁷Kweiboug kaleiwag silmanin kanig, nilel wadakul, Yowbad nisek Moses nakaleiwag towen son mititeilin avakaein, ikatipel inek Moses, magin mo ikamnat; ilakamnat singay ee... mo iyenom-nen; Moses iyum, inekes tasiyas min-Yisleil; ta-māwan bikinbunikes magin, peinan mititeilin avakaein.

⁸Tage kaleiwag kweivaw, Kululuwan waseg nisekeids son mititeilin singay avakaein.

⁹Kweiboug kaleiwag waseg niyateles gamag iyagages; mititeilin gog nises. Tage kweivaw kaleiwag bikidumwāluds mo beivag mititeilin singay avakaein.

¹⁰Mamagina kweiboug kaleiwag mititeilin bo ikous, peinan kweivaw kaleiwag mititeilin singay bo ilisow.

¹¹Kweiboug kaleiwag nag bises bisigeg; tage kweivaw bises bisigeg, mapun singaya immteil.

¹²Danamis peinan kweivaw kaleiwag waseg bo bikatinabweids; mapuna takapwapouts.

¹³Yakids nag māwan Moses. Peinan Moses bo ipulum magin vāgan min-Yisleil nag bikines nakabiyokous mititeilin, peinan niyyenom-wan ee... mo ikous.

¹⁴Tage ninous moumouvit, nag ikakins. Nagein tut townen ivnivins kweiboug kaleiwag, kweim townen igawa ililum mites. Nag ikines mititeilin Yowbad. Misinaka Kelis bikaliyow mo bikakins.

¹⁵E, tut nagein townen ivinis Moses nakaleiwag tage kweim igawa ililum ninous. Nag ikakins.

¹⁶Igaw, kukin kal bitouvin binek daGuyaws, mo bikaliyow kweim townen.

¹⁷DaGuyaws townen mamagina Kululuwan. DaGuyaws Kululuwan bilikud mo biten wamnat.

¹⁸Yakids bo ikaliyow magids, takikines daGuyaws mo imteilids, mo kakit kakit ikatlow magids imlavag mawana magin tonen. DaGuyaws inawotet townen, peinan kululuwan mav.

Tasiyas nag isimounids

4 ¹Yowbad inok nuwan yakamey, mo isekem mawotet townen. Mapuna nag kagwey waseg.

²Bo kapiyev kalbaleb sinap, o aveiyag kalbaleb nisowmes. Nag kakatidavis gamag. Nag kakatilow Yowbad anilivan. Tage amalivan mound, kamnat; kukinemas katamanaw wamtamiy, kuliganes amalivan, mo bukukwakins amasinap kamnat. Yowbad ikakin mawan.

³⁻⁴Kukin aw-sinap bisowm makageiguy wanuwan; bo isowm wasigeis tasiyas takankanigs. Nag bikakins tasiyas. Nag isimounids. Peinan ven watinow gimgilis sitovek kalbaleb bo ivag ninous ikanig, vagan livanen Kelis nag bimteilis tasiyas; Kelis takamnat tonen, mawana Yowbad.

⁵Nag kageiguy livnem, tage livanen Yeisuw Kelis, peinan datoveks, o yakamey mitouwat yakamey, silmanin bakawtel Yeisuw nawotet.

⁶Yowbad kweiboug nilivan, ilana, “Kadiloka kamnat bimteil ven, peinan dadub.” Mtownen bo imteil kateids mo takakins yakawanan Yowbad, nises Kelis waseg.

Pawl aban igeg

⁷Sinapun libalab wakatem mamagina veigun bwanabwein wanuwan kaynad kweiboug; peinan tougwey yakamey. Yowbad nakaleiwag mawan vagan babaw gamag bikakins tatonen natawtoun singay; yakamey nag.

⁸Babaw gamag iyagagemas, tage nag kakalouw. Isunasun ninom, tage nag kapiyev wotet.

⁹Bo iyagagemas, tage Yowbad nag ilisawem. Iwawemas, tage nag ikatimatemas.

¹⁰Wom waseg kakokew Yeisuw inamouvit, vagan mwamovan Yeisuw mo bikamat wawom.

¹¹Igaw mwamov yakamey tut babaw biyagagemas bakakanig, peinan Yeisuw angamag yakamey, vagan bukukines mwamovan Yeisuw wawom.

¹²Yakamey wanuwan kanig, tage yakamiy kumwamovs.

¹³Kweiboug teitan nilel mamagina:

“Asimounid mapuna alivan.”

Yakamey kasimounid maʻwan, mapuna kalivan.

¹⁴Kakakin Yowbad niyakit daGuyaws Yeisuw Kelis kanig waseg, igaw mo biyakituds sods Yeisuw, bitokeids simayas yakamiy bimayeids mo bitatomos wamatan.

¹⁵Mawotet towen pinamiy yakamiy vaʻgan Yowbad nasiwayoub biwekeimiy simiyas babaw gamag, mo bikalin nuwads singay, yakamiy o yakamey; babaw yaʻkids bitayaʻkawns Yowbad waseg.

¹⁶Mapuna nag kaʻgwey. Kaleivids biguyaʻgweys, tage Yowbad ikkatimweis kululuwads yam katanok katanok mo tatawtouns.

¹⁷Gamag iyagagemas, tage nuwanaw mo beikous. Wankuyeim anagids bivakaein, mamagina, Yowbad nasiwayoub nag beikous.

¹⁸Youd tasiyas wamatads takines, tage nag taninuwes. Nuwanaw mo beikous. Tage taninuwes youd tasiyas nag takines. Yowbad navavag tasiyas nag beikous.

Dabunatums walbaʻlab

5 ¹Takakins gog wouds mamagina buntuman ven watinow. Kukin bigulekwes, dabunatums kweitan nises, Yowbad nisekeids. Nag bitawlulavaw namad waseg. Bises gog bisigeg walbaʻlab.

²⁻³Igaw ven watinow waseg nitabwayouys, sivinads kid bitakatlawos wouds, dabunatums walbaʻlab mo bitakawes. Awoum tayamkwaneids.

⁴Igaw dabunatums towen nitasesus, ikubukub nuwads. Nag sivinad bitasem woud tasiyas, tage sivinad kweivaw woud bikatilow. Mamagina mwamov bikanpwen woun towen ipsaʻpwas, mo beikous.

⁵Yowbad bo ikatinabweids silmanin mwamovads, mo isekeids Kululuwan mamagina adalivatawns.

⁶Tut babaw mo bitakapwapouts. Takakins igaw wadabunatums ven watinow nag tasitans sods daGuyaws.

⁷Tasimounids waseg mo tawotets. Nag takines, nag.

⁸Takapwapouts, sivinads bitalisawes wouds mo bitanekes daGuyaws.

⁹Tut babaw sivinads aveiyag nikadok nanon, takinew sods kaleivids bitasesus o takinew bitalisawes.

¹⁰Igaw babaw yaʻkids mo bitatowas wamatan. Kelis aʻban waseg bikatkineids, mo bikaleiwag mapun dakalbalebs o dakamnabweins, bo ikunek dawotets ven watinow waseg.

Kweivaw gamag

¹¹Kagoul Yowbad, mapuna kakatimlakes gamag mo isimounids. Yowbad ikakin amasinap. Adok yakamiy-vak waninoumiy kukwakins-wan.

¹²Awoum vayuwein bakakamtilakeimiy vāgan bukukwakins amasinap bwein. Deisa bukukwakins amasinap bwein vāgan bukukwayapams wasigeis yakamey mo bukwatimapus asilivan tasiyas ilansa, “Matuwāvek bwanābweins,” tage situwāvek wanuwes asisinap kalbaleb.

¹³Gamag mwasanin idokemas takabalāwein yakamey. Kukin bakakabalāwein, kakabalāwein silmānin Yowbad. Kukin gog ninom bidumwal, vāgan bakalabeimiy.

¹⁴⁻¹⁵Kelis nasiwayoub waseg bo isimkinem silmānin nawotet. Kakakina bo ikanig peinads babaw yakids; mamagina takanig babaw yakids, mo tamwamovs silmānin nawotet mtowen, dawotets tatoneids awoum. Mtowen gog bo ikanig peinads, mo iyakit vayuwein.

¹⁶Bo ikous makanuway kweiboug, mamagina gamag babaw idokes kalisiy bwein, kalisiy kalbaleb, peinan ikines askakin watoulān. Kweiboug māwan kadok Kelis takalbaleb; tage bo ikous makanuway māwan towen.

¹⁷Kelis waseg bo bitamlavag kweivaw gamag. Kweiboug bo ikous. Kweivaw bo isap.

¹⁸Yowbad nawotet towen, peinan itam Kelis silmānin lun bulukwan, mo ilun wasigeis yakids, mo isekeids dawotets vāgan gamag babaw bo beitams waseg Yowbad inalun.

¹⁹Peinan Yowbad son Kelis nises mo ilun wasigeis yakids ven watinow gimgilis. Nag inuw adsinaps kalbaleb vāgan bimop, nag. Ilun wasigeis yakids mo isekeids dawotets vāgan gamag babaw mo beitams waseg Yowbad inalun.

²⁰Mapuna kakokew Kelis anilivan. Yowbad bo iguyeimiy wudom waseg. Kelis anilivan waseg kaguyeimiy kadiloka kutams Yowbad inalun wasigeis yakamiy.

²¹Kelis nag ivag ansinap kalbaleb tage Yowbad ivag Kelis mo imlavag mamagina sinap kalbaleb tonen peinads yakids, mo sods Kelis bitakawes Yowbad ansinap didumwal.

Ikalin nuwan min-Kolinit wasigeis

6 ¹Simey Kelis mo kawotet, kagilagel wasigeis yakamiy, kalana, “Awoum bukutams mav Yowbad nasiwayoub waseg.”

²Bo ilivan gog, mamagina idibakeim yak, ilana,

“Bo kadilok tut towen mo aligen amlivan mapuna alabeim yam towen nakatinabweim.”

Kuninuways avei-tut ikadilok. Nagein gog. Nagein Yowbad mo bikatinabweimiy.

³Nag kweitan abkalouw bakasein gamag wasiked; nag. Mata ge bakawotet kalbaleb mo bukuvtokemas livan.

⁴Tage makawotet bukukines mo kukwakins moundid Yowbad natouwat yakamey. Singay kakaptulem moumouvit waseg, iyagagemas, abem igeg singay.

⁵Bo iwawemas, iseinimas wādeil, bo ikawnāweins mav. Kawwotet ee... bo ikalālav nimem, nag kamasis bwein, kasesun-wan amamoun.

⁶⁻⁷Tage amasinap bwein, nag kayamen asisinap kalbaleb, tage kasiwyoubus, Kululuwan Bwanabwein nilabem, mo kasinap bwein, masiwayoub moundid wasigeis gamag babaw. Amalivan moundid, Yowbad natawtoun waseg. Nakayyous sinap didumwal wuliyougwan wamakātay wamakimaw vāgan bakatawtoun.

⁸⁻⁹Kweitan tut ivnāsemas, kweitan tut mo iyagemas. Kweitan tut idokemas kalbaleb; kweitan tut idokemas bwein. Ilansa, “Takatidavidavs tasiyas,” tage amasinap moundid. Idokemas tobwag gamag yakamey, tage Yowbad ikakin amasinap bwein. Idokes kid bakamtāmat, tage bwein sona mwamovem. Bo imapus amasinap; iwemas tage nag kakanig.

¹⁰Kalbaleb kalivet mapuna igeg ninom, tage kamwāsaw tut babaw. Tasimavs yakamey tage kassekes gamag babaw mo iguyaws. Mawliyoug nag, tage youd babaw yakameyana mavavag.

¹¹O sigwey min-Kolinit agulivan babaw peinan nuwaneimiy waseg yey nises.

¹²Nag kasināleimiy. Tage yakamiyana nukusinālemas, mo kupiyavemas.

¹³Ikālin nuwag yakamiy. Kadiloka bikālin nuwamiy yey, peinan mamagina nitug yakamiy.

Kadiloka bipiyaves youd kalbaleb

¹⁴Awoum kwativases simiyas tasiyas nag isimounids. Tabta sinap didumwal bikatuvās son sinap kalbaleb, ne? Tabta kamnat beimwas son dadub, ne?

¹⁵Tabta Kelis beitam son Baloum, ne? Kukin bukusimounid waseg Kelis, amāwan bukwaveiyons soum townen nag isimounid Kelis waseg?

¹⁶Yowbad Tamwamov nabunatum yakids. Awoum bitatams tobwag yowbad youdanen waseg. Yowbad anilivan mamagina:

“Yey basik baninoun wanuwes tasiyas, siYowbad yey o tasiyas gungamag.”

¹⁷Yowbad anilivan mamagina:

“Kadiloka kulisawes tasiyas takalbalebs, kusināles. Awoum kwabkwanes youd bwaboum, kupiyaves, mo bikalin nuwag wasigeis yakamiy.”

¹⁸“Yey bamlavag timamiy yey, o yakamiy nitug, tawaw vinay yakamiy.”

Yowbad Tatawtoun anilivan māwan.

7 ¹Sigwey, Yowbad bo ilivnek youd tasiyas bwanabwein peinads yakids. Kadiloka bitawidis wouds bigimagim, o kululuwads bikamnat, mo beivag adsinaps kamnat tatonen, peinan tagoulus Yowbad.

Pawl ikakina asisinap ibwein mo imwasaw

²Bikalin nuwamiy yakamey. Nag kayageg teitan gamag. Nag kasilakod. Nag kasilponay; nag.

³Nag alivan mawan vagan bakaneimiy, nag. Kweiboug alana, “Nuwaneimiy wasigeis yakamey nises; takinew bitamats simayas yakamiy; takinew tamwamovs simayas yakamiy.”

⁴Akakin-wan amisinap bwein; singay ikalin nuwag pinamiy, mo ibwein nanoug. Igaw abag igeg, tage amwasaw avakaen.

⁵Tutan makaṅoy nakam Masidoniy mo mamouvit kalivet. Nag kamasis bwein peinan youd babaw iyagagemas. Wouds watoulan, naviy; tage wanuwads pwayat.

⁶Yowbad gog ililabes tasiyas ninous igeg. Ilabem yakamey, peinan Titos neim.

⁷Bo ikalin nuwag peinan akin Titos, bulgamiy iwyakeig, ilana, “Tasiyas asisinap bwein, akines. Bo ikalin nuwag. Tasiyas sivines yakoum, asimwasin waseg mo ivalams, itoukums peinam.” Aligen mo itaw nuwag, amwasaw nag bikakit vagan.

⁸⁻⁹Kweiboug millet nalel neiw kuvinis mo igeg ninoumiy; yeyvak igeg nanoug. Tage yakamiy igeg ninoumiy yam mwasanin mo kupiyaves amisinap kalbaleb; nagein mo amwasaw peinan alel millet mo kuliganes aygag. Nag amwasaw peinan ayageg ninoumiy, nag. Tage peinan ikanavin ninoumiy inek Yowbad. Bo ayageg ninoumiy, tage nag ayageimiy yakamiy.

¹⁰Magat Yowbad biyageg nanoud vagan bitapiyev adsinap kalbaleb, mogo bikatinabweid. Awoum bitapiyev Yowbad nakaleiwag towen. Magat bigeg nanouds peinan youd aveiyag ven watinow, tage nag bitanuways Yowbad, mtowen nag bikatinabweids. Bo bigak mwamovads.

¹¹E, kuvinis let mo igeg ninoumiy, ne? Bo iseiw nuwamiy vagan beibwein amisinap, ne? Mitawtoun waseg bo kupiyaves sinap kalbaleb; kuwenes sinap kalbaleb, sivinamiy gog sinap bwein; bo kutoukums, ne? Peinan kumapus simiy mtowen ansinap kalbaleb. Youda babaw waseg akakin amisinap bwein.

¹²⁻¹³Bo alel millet nag silmanin simiy towen-nan takalbaleb, nag silmanin tayuwein towen simiy nisilkod. Silawun gunalet misinaka bukukines wamatan Yowbad singaya kuvnasemas yakamey. Ninoumiy ibwein yakamiy, mogo ibwein ninom yakamey.

E, Titos ikineimiy mo itaw nuwan, imwasaw. Yakamey-vak kakin mtowen Titos mo ibwein ninom, kamwasaw.

¹⁴Kweiboug nag asilponay mav, tage akayapam, adibek Titos, alana, “Min-Kolinit asisinap bwein.” Nag bayaweid vagan mo beivag agumwasin, nag. Mawan amalivan babaw moundid nakadibakeimiy, mo gunakayapam waseg Titos ikakin moundid.

¹⁵Kweiboug amisinap kalbaleb, amipwayat; itatat woumiy, mo kutams townen Titos waseg, nukukwanawes aygag, mapuna nagein tut townen singay nuwaneimiy ivag waseg Titos.

¹⁶Nagein amwasaw peinan akakin amisinap bo ibwein.

Muloul

8 ¹Sigwey, ivag sivinag bukukwakins Yowbad bo ilabes tasiyas tayakelesiys ven Masidoniy waseg, mo imulouls bwein.

²Abes singay igeg. Tasimavs tasiyas, tage imwasaws avakaein, waseg imulouls singay bwein.

³Bo ikadilokes mawan mo imulouls; ikous, mo imulouls sivyuwein; singay sivines. Wamatag bo akin.

⁴Bo igilagels wasigeis yakamey, ilansa, “Singay sivinem bakalabes tasiyas tayakelesiys Yelusalem waseg.”

⁵Ninom nag mawan tage singay imulouls. Wanmugwana, tatineisina itames, daGuyaws nagamag o yakamey magamag tasiyas peinan Yowbad nanon mawan. Tatineisina itames, mo imulouls wankuyeim.

⁶Titos bo isilamaw wotet townen wasigeis yakamey mapuna kadibek kalana, “Kadiloka kulabes min-Kolinit vagan bimulouls bwein.”

⁷Yakamiy kumugwas youd babaw waseg. Kusimounids bwein, kugeiguys bwein, amisinap avakaein, bo iseiw nuwamiy silmanin miwotet, o kusiwayoubs bwein wasigeis yakamey. Kadiloka bo bukumugwas muloul waseg.

⁸Nag tayakeikay yey, tage alivan mawan vagan bukukwakins ven mwasanin gimgilis iseiw nuwes muloul silmanin, mo bakin, moundid misiwayoub, o nag.

⁹Kukwakins nasiwayoub daGuyaws Yeisuw Kelis, guyaw avakaein tage peinads yakids mo imlavag tasimav townen. Tasimav townen bivageids mo bitamlavags guyawaw yakids.

¹⁰Nanoug mawan. Kadiloka bukuyakousis wotet townen nukusilamaws bweilim nein wankuyeim. Yakamiy wanamug sivinamiy wotet townen. Wanamug-vak mo kusilamaws wotet townen, muloul silmanin.

¹¹⁻¹²Mawana niseiw nuwamiy nukusilamaws-yay, mo biseiw nuwamiy bukuyakousis muloul townen. Mivavag nises silmanin wotet townen. Awoum kuninuways, kulansa, “Nag aveiyag nises waseg yey.” Awoum. Bweina biseiw nuwamiy mo kusekes aveiyag mivavag nises, Yowbad mo bikalin nuwan peinan ninoumiy mawan.

¹³Nag ivag sivinag mimuloul bivakaein singay, mo bigagab ven mwasinis simuloul, nag.

¹⁴Misinak tut townen, peinan miwliyoug babaw kumulouls bwein mo kulabes sidayas, peinan tasimav tasiyas. Igaw siwliyoug bibabaw tasiyas tasimavs, o bikabwag wasigeis yakamiy, mo bilabeimiy. Mamagina bo bikobobt-wan.

¹⁵ Livānen nises mamagina:

“Tasiyas kaeis nisiyavis avakaein nag ivag anatup,
tage tasiyas tasiyas nisiyavis kakit, kaeis bo ikadilok.”

Titos siney budan

¹⁶ Kalin nuwag Yowbad peinan nanon isek Titos mo sivinan bilabeimiy, māwana yakamey sivinem.

¹⁷ Kadibek Titos biwekeimiy, bo itam; tage singay sivinan beiw, peinan nanon māwan.

¹⁸ Kakayabes biweis Titos son bwadads towen butun niliganes tayakelesiys ven babaw wasigeis, peinan singay bwein igeiguy livānen daGuyaws Yeisuw.

¹⁹ Tasiyas tayakelesiys mo isekes-vak nawotet mo simey towen katāvin ven babaw kakokew mimuloul, vāgan bakalabeimiy, Yowbad yakawanan silmānin.

²⁰ Awoum gamag mwasanin bivtokemas livan, bilansa, “Muloul towen avakaein, tage nag imtakavates bwein.”

²¹ Tage sivinem beivag amasinap bwein daGuyaws wamatan, o gamag babaw wamtes.

²² Kakayeb siyas asteiy sisiy tatounun teitan bwadads. Tut babaw nakayakwen bwadads towen mo kaban ansinap tawtoun. Tut gog towen ikakina amisinap bwein, mapuna bo iseiw nuwan silmānin wotet towen wasigeis yakamiy.

²³ Veiyoug towen Titos ililabeig gunawotet waseg mo bakalabeimiy. Sisiy Titos gamag tasiyas budidayas, tayakelesiys nikayabes silmānin Kelis nawotet bwanabwein.

²⁴ Kadiloka misiwayoub beibwein wamtes tayakelesiys babaw. Livānen misiwayoub nakadibakes tawaw tasiyas. Igaw bikineimiy mo bikakins amalivan moundid.

Bimulouls silmānin tasiyas tasimavs

9 ¹⁻² Nag kadilok balel millet, balana, “Kadiloka bukumulouls silmānin tasiyas tayakelesiys,” peinan nanawana bo kukwakins. Bo iseiw nuwamiy silmānin wotet towen. Bo kukwatinages bweilim nein wankuyeim. Yey adibakes min-Masidoni, alana, “Min-Kolinit, ven Akay waseg, bo iseiw nuwes, bo ikatinages simuloul bweilim nein wankuyeim.” Tasiyas iliganes, mo iseiw nuwes mwasanin, māwana yakamiy.

³ Yey mo akayabes budidayas biwekeimiy, alana, “Bo ikatinages simuloul, nises.” Awoum biwekeimiy mo bibānes agulivan yaweid, awoum.

⁴ Igaw wankuyeim mo bakaw sigwey min-Masidoni mwasanin. Kukin nag kukwatinages mo beivag amamwasin, peinan tayyaweid yakamey. O yakamiy-vak beivag amimwasin seikwan.

⁵Adok kid kadiloka budidayas tasiyas bimgwayeigs, alana, “Kumgwayeigs kulivakas simuloul townen nilivanes. Igaw baw mo bitames simuloul townen beibwein. Awoum tasiyas bidokes muloul mamagina kid payin, nag.”

⁶Kadiloka kukwakins silawun, peinan muloul māwana youpeis. Kukin youpeis bisapwes nag ibabaw mapun mo bitayoys kakit. Kukin gog youpeis babaw mapun bitayoys babaw.

⁷Tatanok tatanok gamag yakamiy, kavel nanon māwan, bweina bimuloul māwan. Awoum kumulouls sona miwnayuw, kadiloka kutams-wan kusenans mimuloul. Yowbad gog sivanan gamag bininatouts mo bimulouls.

⁸Yowbad nasiwayoub kadiloka bikatimweis bibabaw wasigeis yakamiy. Nag aveiyag bikabwag wasigeis yakamiy, vāgan bukumulouls bwein silmanin wotet babaw bwanabwein.

⁹Livānen daGuyaws nises Bukitab waseg mamagina:

“Nawliyog ilivelov, ivvagein issekes tasiyas tasimavs.

Ansina siwayoub bises bisigeg.”

¹⁰Yowbad anyoupeis ivagein, isekes tasiyas tabgubags, o kads ivag mo isekeids bitakams. Mtowen bo bikatimweis amiyoupeis bibabaw, mo bivag bisibwasobs bivakaevin vāgan bukusiwayoubs waseg; anagin mo bukubānes.

¹¹Mamagina bukumliguyaws yakamiy mo bukusiwayoubs bwein. Yakamey bakalabeimiy, mo gamag babaw bikavasis Yowbad.

¹²Miwotet townen waseg kulabes tayakelesiys tasiyas tasimavs, mo gamag babaw bikavasis Yowbad.

¹³Mamagina Yowbad iyakwaneimiy. Kukin bukusimounids, o bukutams waseg livānen Kelis, mo bukumulouls bwein silmanin tayakelesiys tasiyas tasimavs, sisiyas babaw gamag. E, tasiyas tasimavs mo bikavasis Yowbad.

¹⁴Gamag tasiyas sivines yakamiy, initougs Yowbad waseg vāgan bilabeimiy, peinan Yowbad bo ilabeimiy mo nukumlavags tasiwayoub tatonen yakamiy.

¹⁵Nag bitalivan, Yowbad nasiwayoub singay avakaevin. Kalin nuwads silmanin Yowbad.

Pawl nawotet

10 ¹Yey Pawl toneig-wan agilagel wasigeis yakamiy. Peinan Kelis ansinap bo iyamanum. Yey agusinap-vak wamtamiy aymanum tage kulansa, “Kadiveiyov nises mo iwon.”

²Agilagel wasigeis yakamiy. Igaw mo baw nag sivanag bawon bakaneimiy, awoum. Mwasanin yakamiy kuvtokeigs livan, kulansa, “Paul nanon tatonena iwtel.” Kukin nag bikanavin ninoumiy mo baw bakaneimiy, Yowbad natawtoun waseg.

³Yey guntawtoun nag mawan ven watinow sinapun. Nakases ven watinow tage nag kakanaviy mawan tasiyas ven watinow gimgilis.

⁴Nag kakokew naviy wuliyougwan, tage libalaba wuliyougwan kakokew, mo ikadilokem bakatawtoun Seitan nakaleiwag waseg.

⁵Mogo kagidem tawtoun livan son sinap kayyapam; o kagidem sinap silabod waseg bisilbwades livanen Yowbad; mo katawtoun waseg nuway babaw, vagan gamag babaw mo bikanawes aygan Kelis.

⁶E, bo batawtoun wasigeis yakamiy. Igaw bukwanawes kaleiwag babaw bwanabwein, mo bamop asisinap tasiyas takapidabs.

⁷Askakin wamitamiy kukines. Tage kukin kal idok Kelis angamag towen, kadiloka binuweig Kelis angamag yey, mawana towen.

⁸Kukin bakaypom kaleiwag, nag beivag agumwasin. Peinan datoveks bo isekeig gunakaleiwag vagan bakatimweis amisinap bitawtoun. Nag isekeig gunakaleiwag vagan biyagagemiy.

⁹Awoum balel milet tawtoun mo beivag amipwayat. Awoum.

¹⁰Gamag mwasanin ilansa, "Let waseg anilivan tawtoun, tage igaw beim mo bukukines aygan igwey, o nag igeiguy bwein."

¹¹Kukin kalisiy asilivan mawan mo badibakes tasiyas, "Aveiyag balel walet igaw baw mo bavag wantamiy."

¹²Nag ikadilokeig balana, "Yey agusinap tawtoun," nag. Simiyas mwasanin asilivan mawan. Tasiyas gog iblabol ninous, ilansa, "Tasiyas asisinap bwein, yakids bwein singay." Tage nag ikakins sinap tatonen.

¹³Yey misinaka balivan agusinap tatoneig o gunawotet tatoneig; peinan Yowbad bo isekeig gunawotet wasigeis yakamiy.

¹⁴Kukin gunakaleiwag nag iwekeimiy Kolinit waseg mo balivan mav wasigeis yakamiy. Nag gog, wanmugwana bo asekeimiy livanen Kelis.

¹⁵⁻¹⁶Nag akayapam kaleiwag waseg. Peinan nag tayuwein tawwotet iwekeimiy, nag. Adok kid bukusimounids beibwein mo makaleiwag bikatimweis bivakaein wasigeis yakamiy, simiyas ven kadiveiyoy gimgilis, tasiyas niweiw-o. Awoum bakayapam waseg wotet towen niwtel teitan gamag.

¹⁷Kukin kal tallivek, awoum bilivan livanen ansinap tatonen; bweina bilivan daGuyaws livanen.

¹⁸Yowbad nag bikaypom gamag kavel idok tonen ansinap bwein; tage Yowbad bikakin ansinap bwein, mo bikaypom.

Pawl nag mawana tasiyas takatidavidavs

11 ¹Yey alivan mawana takabalawein yey. Awoum bikawegweis woumiy, mo bakamtel nanoug.

²Yey apwakit wasigeis yakamiy mawan Yowbad ipwakit wasigeis yakamiy. Bo abokeimiy simiy Kelis mamagina vin naptabod binek namwan anmwanet. Sivinag mawan batokeimiy bukunekes Kelis.

³Tage agupwayat Seitan, peinan kweiboug mamagina mwatet ansinap tawtoun ikatidev Iv. Adok yakamiy māwan igaw bikatidaveimiy mo bukupiyaves tapwāloul kamnat waseg Kelis.

⁴Nakageiguy livānen Yeisuw. Tage igaw kal beiw bigeiguy tobwag Yeisuw, o tobwag kululuwan biwekeimiy, o livan towen bwanabwein nukuliganes kukin bukupiyaves, mo bukutams tobwag livan waseg. E, bo kutams waseg, mwasanin yakamiy.

⁵Takaweins livan towen, kudokes singay bwein gamag; tage nag bilaveigs yey.

⁶Kukin nag balivan tawtoun, tage agusinap tawtoun. Youd babaw bo akatimlakeimiy ikous.

⁷Kweiboug sigwey yakamiy nasekeimiy bwanabwein livānen Yowbad. Nag kweitan muloul akow. Yey ābus vāgan bayamweneimiy. Tabta agusinap towen kalbaleb, ne?

⁸Mamagina nitavenos simoney tasiyas ven mwasanin tayakelesiys, peinan bo akow simuloul wasipalatan vāgan bawotet yakamiy wamipalatan.

⁹E, igaw kweiboug sigwey yakamiy nitasesus mo ikābwag gunwuliyoug, nag anitoug wasigeis yakamiy. Sidayas gog min-Masidoniy nimeis mo isekeigs.

Mapuna nag anitoug. Nag kweitan mumuloul avag vāgan bimouvit wasigeis yakamiy, nag. Igaw nag bavag, nag.

¹⁰Agulivan tawtoun towen. Nag teitan bisilbwed agulivan towen ven Akay waseg. Tabudabod Kelis.

¹¹Wawun nalivan māwan, peinan singay asiwyoubumiy. Yowbad ikakin.

¹²Gunawotet māwan, waseg bavvalut ee... mo babob asilivan tasiyas nikayapams peinan idokes siwotet māwana yakamey.

¹³Tasiyas idokes tatineis takaweins livānen Kelis. Tayyaweids gog. Siwotet waseg ikatidavis gamag, peinan askakin māwana takaweins livānen Kelis.

¹⁴Magen! Seitan-vak ivag ankakin māwana gum-libalab, kamnat waseg.

¹⁵Igagaba natouwat tasiyas bivages askakin māwan takaweins sinap didumwal. Sikabiyokous kalbaleb, peinan siwotet kalbaleb.

Tut babaw āban igeg Pawl

¹⁶Vayuwein alana, “Awoum kudokeigs takabalāwein yey.” Tage bukudokeigs takabalāwein, kadiloka balivan kakit māwana tasiyas takabalāweins, mo kuliganes agulivan.

¹⁷⁻¹⁸DaGuyaws nag ikaluweg agulivan vāgan bakaypom sinap, tage bakaypom māwana takabalāwein yey, māwana tasiyas ikaypamwes sinapun ven watinow.

¹⁹Yakamiy kutams bwein wasigeis tasiyas takabalaweins, peinan adok amisinap tawtoun yakamiy!

²⁰Bukutams bwein, kukin kalisiy bikaweimiy binaweimiy silmanin siwotet bukuwteles, o kukin bikwekways mivavag o bisilkodeimiy, o bikaypamwes asisinap, mo beiweisy mitamiy. E, mo bukutams waseg mituwavek tasiyas.

²¹Nag ivag guntawtoun silmanin wotet mawana tasiyas. Mapuna agumwasin ivag. Kukin kal bitawtoun mo bikaypom; o yey-vak kukin batawtoun bakaypom mo bamlavag takabalawein yey. Tage bo bakaypom.

²²Adok tasiyas min-Ibliw. Yey mawan. Adok tasiyas min-Yisleil. Yey mawan. Adok tasiyas Ebelam delen. Yey bo mawan.

²³Adok tasiyas Kelis natouwats. Bo alisawes tasiyas. (Agulivan mawana takabalawein.) Yey alisawes wotet waseg, o deil waseg; peinan tuta babaw gamag niwaweigs, kakita bukanig.

²⁴Sivanim min-Yudiy iyousigs mo iwaweigs vatul waseg. Vatul waseg biwaweigs babewein sinawatoun kweinim kweivas.

²⁵Sivatan iyousigs mo iwaweigs amweilok waseg. Sivtanok dakul ikawes, ilivelovs, imimekeig, iwaweigs. Sivatan amukul wawag. Sivatan iyatuwaneig wakunuwatan yol katanok yam katanok boug.

²⁶Tut babaw atitavin, alouvat youd kalbaleb nisesus walay. Waked-vak tavveinaws tawayins gamag nisesus. Agugwamag sivines kid beiweigs; tobwag ven gimgilis sivines kid beiweigs. Sivines kid beiweigs waven o wanawoud o wabwanit. Sidayas tasiyas tayyaweids beiweigs kid.

²⁷Gunawotet waseg son agupulikas, sona moumouvit; nag amasis ibwein, agumoun, agudak, tut babaw ikamateig moun, son aguloulun amasis wamnat.

²⁸Sona youd tasiyas yam katanok katanok ikubukub nuwag waseg imouvit gunawotet wasigeis tayakelesiys vena babaw.

²⁹Kukin kal beigwey mo bigeg nanoug; o kal bikalouw mo bikapasal nuwag peinan youd towen ivakaben.

³⁰Kukin balivan, peinan vagan bukukwakins amawan tougwey yey.

³¹Awoum bayaweid. DaYowbads, daGuyaws Yeisuw taman, ikakin agusinap mound. Kalin nuwads Yeisuw tut nag beikous.

³²⁻³³Ven Damasik waseg, tutan Aletas king ven towen waseg, Tanuwagan ven inagamag ikaymates awkwedan ven, sivines kid biyousigs. Tage taliwog ikaliyowes sintaboul ven boul-nen waseg, yey asin wanuwan kaynad, ikaygwagweigs ee... an aton watinow, anoun, mo alisow towen nikamliweig.

Inoun ikin libalab

12 ¹Bo bakayapam. Nag bilabeig; tage bakaypom sinap, peinan daGuyaws sinapun bo akin, isisawl matag, mo ikatimlakeig.

² Sinawatan kweivas bweilim nein wankuyeim taw teitan waseg Kelis inoun libalab kasilatoun waseg. Adok won waseg o adok kululuwan waseg. Nag akakin. Yowbad ikakin.

³ Yowbad bo ikow taw townen inow naven bwanabwein waseg. Adok won waseg o adok kululuwan waseg. Nag akakin. Yowbad ikakin.

⁴ Libalab waseg gamag townen iligen sinap kweitan. Nag kadilok gamag bikamtel o bikavteg ven watinow; bwaboum.

⁵ Bakaypom ansinap taw townen, tatoneig awoum. Misinaka balana, “Tougwey yey.”

⁶ Tage kukin sivinag bakayyapam, nag beibol agulivan, nag bayaweid, peinan moundid agusinap. Tage nag bakaypom sinap. Misinaka kukines agusinap o kuliganes.

⁷ E, Yowbad bo ikamtilakeig sinap babaw. Tage nag sivanan bamwasaw avakaein; mapuna ivag kaligweg kweitan kakat ibes viniyonag, mamagina Seitan nagamag townen ivvasiganig. Mata ge bamwasaw avakaein.

⁸⁻⁹ Sivaṭoun anitoug silmanin daGuyaws bikablev youd townen, tage bo ipiyev, ilana, “Gunsiwayoub bo ikadilokeim. Mugwey waseg mo bikamat guntawtoun.” Singay sivinag balana, “Tougwey yey,” vagan Kelis natawtoun mo bimekeig.

¹⁰ Mapuna ikunaigeig gunagwey, yagay, moumouvit, silakod, o aveiyag biyagageig, peinan Kelis angamag yey.

Igaw tougwey yey tage wanuwag tawtoun.

Pawl ikubukub nuwan silmanin min-Kolinit

¹¹ Mamagina takabalawein agulivan townen. Peinan kusimkineigs. Tage kadiloka bukwavasigs. Takaweins livanen Kelis tasiyas tawtous nag ilisawegs, tasimav yey.

¹² Namag mulin gunawotet navvag bo kukines, singay tawtoun, o tut babaw akaptuleig, peinan moundid takawein livanen Yeisuw yey.

¹³ Aveiyag asekes tasiyas tayakelesiys ven babaw, tage nag asekeimiy yakamiy? Misinaka youd townen. Nag akow muloul wasigeis yakamiy. Magat agusinap townen kalbaleb kadiloka kunumlaves.

¹⁴ Kakita baw mo beivag sivaṭoun bakineimiy. Nag bakow miwliyoug. Nag ivag sivinag mivavag. Sivinag yakamiy. Awoum nitug yakamiy bukumulouls waseg timamiy yey. Kadilokeig bamuloul wasigeis nitug yakamiy.

¹⁵ Bweina bavgen gunwuliyoug beikous o mwamovag beikous silmanin kululuwamiy. Sivinag yakamiy, mo bukupiyaveigs, ne?

¹⁶ Moundid nag akow mivavag, tage kulansa, “Bo ikatidavids.”

¹⁷ Tage tasiyas nakayabes niwekeimiy, tabta ikatidavimiy tan? Ne?

¹⁸ Bo aguy Titos vagan biwekeimiy, mo iweis son bwadads. Tage Titos ikatidavimiy tan? Ne? O yey agusinap amawan? Amasinap katanok-wan. Nag kakatidavimiy, nag.

¹⁹Waninoumiy waseg agulivan māwana, vāgan bikalin nuwamiy waseg yey? Nag. Kelis angamag yey alivan wamatan Yowbad. Sigwey yakamiy sivinag bakatimweis amisinap, mo bitawtoun.

²⁰Awoum bawekeimiy amisinap kweitan, bo bapiyaveimiy. Adok nag beivag sivinamiy agusinap towen. Adok kwamnims, imouvit dibamiy, kapasal nuwamiy, kusilakods, kuyagays, kuvtokays livan, kwayyapams sinap, mikaleiwag kalbaleb.

²¹Awoum ge vayuwein baw mo Yowbad bivag agumwasin o bigeg nanoug wamtamiy. Magat taggeinawls tasiyas nag bipiyaves asisinap kweiboug kalbaleb o peinan ikaninavays mav.

Nakabiyokous anilivan

13 ¹Igaw baw mo beivag sivatoun tut bakineimiy. Kukin bukuyateles simiy, amiteiy o amiteitoun bikavtagis ansinap kalbaleb, kadilok mo bukumapus.

²Sivyuwein nawekeimiy bo adibakes tasiyas takalbalebs sisiyas asibabaw, alana, “Kukin sivtounun baw mo bamop amisinap kalbaleb.” Tut towen kadiveiyov ases mo adibakeimiy māwan.

³Sivinamiy bukukwakins Kelis ikatipel anilivan isekeig, waseg allivan. Igaw baw mo bukukwakins. Kelis ansinap wasigeis yakamiy nag igwey; tawtoun igegayous.

⁴Mamagina tougwey towen bo iweiyis, ikatimates waklos, tage bo imov, Yowbad natawtoun waseg.

Yakamey tougweys māwan Yeisuw, tage Yowbad natawtoun waseg bakamov simey Yeisuw, vāgan bakalabeimiy.

⁵Kuyakwaneimiy vāgan bukukwakins, tabta kusimounids waseg Kelis, o nag? Tabta bukukwakins Yeisuw Kelis simiy kusesus? Ne? Tage kukin kal yak nag kusimounid, adok nag.

⁶Sivinag bukukwakins yakamey bo kasimounid waseg Kelis, kawotet bwein.

⁷Kanitoug waseg Yowbad vāgan nag beivag amisinap kalbaleb. Kanitoug māwan, nag vāgan gamag bikakins imawotet bwein. Tage sivinem amisinap beibwein. Kukin bidokes imawotet nag ibwein, bweina māwan.

⁸Ta-māwan bakasilbwed sinap bwein. Deisa bakawotet silmanin sinap bwein.

⁹Kamwasaw tougwey yakamey, peinan kutawtouns yakamiy. Kanitoug waseg Yowbad silmanin bikatimweis amisinap, bitawtoun.

¹⁰Nagein kadiveiyov ases al el millet towen. Igaw baw, awoum bakaneimiy waseg gunakaleiwag daGuyaws nisekeig, vāgan bakatimweis amisinap, bitawtoun. Gunakaleiwag towen nag vāgan bayagageimiy, nag.

¹¹Adok misinak agulivan sigwey yakamiy. Taneimiy-o. Kusinaps beibwein. Kunages gungeiguy towen. Kutameimiy simiyas wasigeis. Niwal waseg kusesus; simiy daYowbads, ansinap siwayoub, niwal.

¹²Kumulouls beibwein simsimiyas wasigeis, peinan Yowbad angamag babaw yakids.

¹³Tasiyas tayakelesiys asilivan siwayoub wasigeis yakamiy.

¹⁴DaGuyaws Yeisuw Kelis bikalin nuwan wasigeis yakamiy; Yowbad bisiwyoubumiy. Kululuwan Townen Bwanabwein simiy bukusesus. Eimen. Yey Pawl.